

Sikũn Pêtre

Simãw Pêtre kot Jejus kôt hkwyjê hwÿr wam kagà nê mênh kôt hõ mênh

Simãw Pêtre na pre kagàja nhîpêx. Jejus nhÿ hã hkrajê jahkre ho mẽ pa xwÿnhjê hõ na pre. Mẽ kêp Jejus kra hkêk xwÿnhjaja ra kot Jejus ã hpĩr kaxyw nhũm pre kagàja nhîpêx nê krĩ piitã hkôt Jejus kwÿjê hwÿr kurê nê kamã hprĩ hã mẽ kãm mẽmoj tã karõ. Mẽ kot arĩ Tĩrtũm kot amnhĩ nhîpêx kôt amnhĩ nhîpêx rãhã ho pa hã mẽ kãm karõ. Nê hamaxpêr o mẽ hamaxpêr rãhã ho pa hã mẽ kãm karõ.

Nê mẽ hkwyjê kot Tĩrtũm kôt amnhĩ nhîpêx ã amnhĩ jarênh tã hkôt amnhĩ nhîpêx kêt xwÿnhjaja nhũm pre tanhmã mẽ harênh to. ã na pre mẽ kãm mẽmoj jarênh nê hã kagà nê krĩ piitã hkôt mẽ hwÿr rênh anê. Nê mẽ kãm:

1 1Pa Kris kôt ixtõ nê ixtõxjaja. Xà mẽ amex? Ot pa mẽ awÿr kagà nhîpêx nê krĩ piitã hkôt mẽ awÿr kurê. Ixpê Simãw Pêtre na pa wam ixte kagà nhîpêx nê mẽ awÿr mênh tã axte hõ nhîpêx. Ixte Jejus Kris nhÿ hã mẽ ajahkre ho ixpa xwÿnh ã mẽ amã hipêx nê kumê. Na pa hte Jejus mã amnhĩ nhîpêx mex o ri ixpa.

Nê mẽ papytãr xwÿnh Jejus Krisja Tĩrtũm pyrã nê mex o mex. Nê wa kot amnhĩ nhîpêxja mex o mex. Jakamã na pre wa tanhmã mẽ pahkrã hto pu mẽ amnhĩ kaxyw wa hkôt pajamaxpêr tÿx rãhã ho ri papa. Na ka htem ixpyrã nê ã amnhĩ nhîpêx anê. Tã pa mẽ amã kagàja nhîpêx.

2Nã Tĩrtũm mẽ mẽ panhõ Pahihti Jejus wa kot amnhĩ nhîpêxja na ka mẽ ra harênh mar tÿx nê. Wa kot tanhmã amnhĩ nhîpêx to nê tanhmã wa hamaxpêr toja ka mẽ mar tÿx nê wa hkôt pix mã amnhĩ nhîpêx. Tã kêr ka mẽ arĩ ã amnhĩ nhîpêx anhÿr rãhã ho ri apa. Jao axãmnhĩx ajamakêtkati nê akĩnh nê apa ho apa. Na pa hte ã mẽ ato Tĩrtũm mẽ Pahihti Jejus Kris wa hwÿr o ri ixpa anê. Na hte Tĩrtũm mẽ ato mex nê mẽ akutã nojarêk rãhã ho pa.

Tĩrtũm kot mẽ pahto mex o pa hã harẽnh

Epas 2.12-13; Wam Tesarõn 1.2-4; Sikũn Pêtre 3.18

3Nẽ Tĩrtũmja àhpumunh tỳx o àhpumunh tỳx jakamã na pu htem hkõt amnhĩ xunhwỳ nhũm amnhĩ tã mẽ pahpumu nẽ mẽ pamã àhpumunh tỳx xà hkwỳ gõ. Hãmri pu mẽ ra uràk nẽ amnhĩ to mex nẽ tãm amnhĩ nhĩpêx o ri papa. Tã kot puj mẽ nhỹrmã ma õ krĩ hwỳr api. 4Na pre mẽ pakukamã amnhĩ jarẽnh o:

—Kot paj nhỹrmã ixkrajê mã ixte amnhĩ nhĩpêx mex kwỳ gõ nhũm mẽ inhỹ hã ho tãm ri amnhĩ nhĩpêx mex o pa. Nẽ ixpyrà nẽ hamaxpêr mex o pa.

Anhỹr jao te ra mẽ pamã hkĩnh xà mex kwỳ nhõr pyràk o mẽ panhĩpêx. Nẽ te ra kot mẽ pahkrãm hamaxpêr mex jagjênh nẽ mẽ pamã kot amnhĩ nhĩpêx mex jagjênh pyràk. Mẽmo kaxyw na pre ã mẽ panhĩpêx mex anẽ? Nà uràk nẽ tãm mẽ pahte amnhĩ nhĩpêx mex rãhã o ri papa kaxyw. Jao mẽ pahte mẽ kêp hkwỳ hkêt xwỳnhjê hkõt amnhĩ nhĩpêx kêt nẽ. Nẽ mẽ hamaxpêr punuj o pajamaxpêr kêt nẽ. Nẽ hpãnhã mẽ pahte Tĩrtũm kõt pix mã amnhĩ nhĩpêx rãhã ho papa. ã mẽ pahte amnhĩ nhĩpêx anhỹrja na mex o mex. 5Tã ã Tĩrtũm kot mẽ panhĩpêx mex anhỹr jakamã kwa kêr ka mẽ kapêr mar tỳx nẽ hkõt pix mã amnhĩ nhĩpêx mex o ri apa. Jao amnhĩ kaxyw hkõt ajamaxpêr rãhã nẽ. Kot kaj mẽ ã amã amnhĩ nhĩpêx anhỹr o apa hprãm hã kot kaj mẽ mããnẽn amã tãm amnhĩ nhĩpêx o apa hprãm. Nẽ mẽ amã Tĩrtũm kapêr piitã mar prãm o ri apa. 6Hãmri nẽ piitã mar pa nẽ mẽmoj punuj piitã nẽ amnhĩ to htỳx nẽ. Nhũm mẽ kêp Kris kwỳ hkêt xwỳnhjaja Kris ã tanhmã mẽ anhĩpêx to htã ka mẽ ãm amnhĩ tã mẽ omu nẽ mẽ umaj mẽ amã Kris kaga hprãm kêt nẽ.

Nẽ mẽ amã Tĩrtũm mã amnhĩ jarẽnh rãhã ho apa hprãm.

Nẽ mẽ amã kapêr mar rãhã ho apa hprãm.

7 Nẽ mẽ amã Kris kõt mẽ atõ nẽ mẽ atõxjê ho mex pix o ri apa hprãm. Jao te mẽ amã amnhĩ tã ma pyràk o mẽ piitã mẽ hipêx o ri mẽ hkõt apa.

8E kêr ka mẽ ã amnhĩ nhĩpêx anhỹr o ri apa. Kot ka mẽ ã amnhĩ nhĩpêx anẽ nẽ mẽ panhõ Pahihti Jejus Kris kõt amnhĩ nhĩpêx mex o mỗ. Hãmri nhũm mẽ akwỳjaja mẽ apumu nẽ mẽ apê Kris kwỳ hã mẽ ajarẽnh kurê kumrêx. 9No kot ka mẽ atõ ixkapêr mar tã hkõt amnhĩ nhĩpêx kêt nẽ hãmri te Tĩrtũm kot anê ate amnhĩ tomnuj rênh par mã ajamaxpêr kêt pyràk. 10-11No na ka htem ã amnhĩ nhĩpêx anhỹr kêt nẽ. Ra mẽ ate Pahihti Jejus Kris kõt amnhĩ nhĩpêx mex jakamã na htem ja hã mẽ apumu nẽ Tĩrtũm kot mẽ ato hkra hã mẽ ajarẽnh kurê kumrêx. Kot kaj mẽ ã hkõt amnhĩ nhĩpêx anhỹr o apa nẽ mẽmo arĩgro hã apunuj nẽ apa htã Jejus kaga hkêt nẽ. Hãmri nẽ nhỹrmã ma Tĩrtũm nhõ krĩ hwỳr api

nhūm mē apumu nē mē ato mex rax nē. Hāmri ka mē õ krī kamã mē panhõ Pahihti Jejus Kris wa kuri atīr tūm nē amex nē apa ho apa.

12Nē na ka mē ra Tīrtūm kot amnhī nhīpêx mar tỳx nē amnhī krã kamã kot amnhī nhīpêx mã ajamaxpêr tỳx o ri apa. Tã nom kot paj arī mē amã ja jarēnh rãhã ho ri ixpa. 13Kormã ixtīr ri kot paj xatã mē amã harēnh o amnhīrīt. Ja na kêt inhmã hprãm. Mē ate nhỹrmã tanhmã ri ajamaxpêr to nē hkaga pumaj. 14Na pre mē panhõ Pahihti Jejus Krisja inhmã tokyx ixyk ã ijarē. Kot paj xep kritpêm ri ixtīr nē ixpa hkêt nē. 15Jakamã na pa kormã ixtīr ri ã mē amã kagã nhīpêx anē. Mē ate inhm̃r pē arī omunh nē kamã harēnh nē Tīrtūm kot amnhī nhīpêx mã ajamaxpêr tỳx rãhã ho ri apa kaxyw.

Pêtre kot no ho Jejus pumunh ã amnhī jarēnh

Matre 17.1-5; Makre 9.1-8; Sikūn Ximotre 3.16-17

16Nē na pa pre ra tanhmã mē amã mē panhõ Pahihti Jejus Krisja jarēnh to. Hihtỳx o hihtỳx ã harē nē àhpumunh tỳx o àhpumunh tỳx ã harē. Nē nhỹrmã akupỹn mē pahwỳr wrỳk ã harē. No na pa pre amnhī krã hkôt ã harēnh anhỹr kêt nē. Na pa pre inhno ho Jejus hihtỳx o hihtỳx ã omunh o hkôt ixpa nē ixte omunh xà hkôt ã mē amã harēnh anē. 17-18Amnepê mã kormã ixkwỳjê mē mē ixte arī hkôt ixpa ri pa prem hkôt hixêt prêk nhīmõk wỳr api. Pa nē kaxyw Xiakre nē Juãw mē pa mē hkôt ixpimràatã hixêt ã api nē himõk ã ixkuhê. Hāmri nhūm Tīrtūm tanhmã Jejus to nhūm hirã htỳx kãm xa. Hāmri nhūm Mēpahpãm Tīrtūmja mē inhmã kapêr. Kaxkwa kamã hirã htỳx rax rúm mē inhmã kapêr o:

—E ota Ixkrata xa. Inhmã hapê ho inhmã hapê. Anē.

Tã ra ixte mar xà hkôt pa amnhī xõ ri mē amã harē nē hã kagã. 19Na pa prem ã hixêt prêk nhīmõk ã Jejus pumunh nē Tīrtūm kot tanhmã harēnh to hã mar anē. Hāmri nē ijamaxpêr o:

—Nà ãm hāmri na pre amnepêm Tīrtūm nhỹ hã kapêr jarēnh o mē pa xwỳnhjaja Jejus kukamã ã harēnh anhỹr o pa. Anē.

Mē kot tanhmã Jejus kukamã harēnh toja te kot kamãt kô kamã kanê hpõk nhĩrã hkryre pyrãk. Tã koja nhỹrmã akupỹn wrỳ hãmri nē te myt kator nē hirã mex nhūm mē pahte mẽmoj pumunh mex pyrãk. Jakamã kwa kêr pu mē kot tanhmã Jejus kukamã harēnh toja mar tỳx rãhã nhūm nhỹrmã te myt kator pyrã nē akupỹn mē pahwỳr wrỳ. 20Tīrtūm kapêr ã kagã htūm kot tanhmã ÿ hã kapêr jarēnh xwỳnhjê jarēnh to. Mē kot mẽmoj kukamã ujarēnh ã mē harē. Nē Jejus kukamã tanhmã ujarēnh to hã mē harē. ã mē kot mẽmoj kukamã harēnh kot anhỹr. Nom na pu htem amnhī krã hkôt ã mē ujarēnh anhỹrja mar tỳx kêt nē. Koja Tīrtūm Karõ hprī hã mē pamã ho amnhīrīt pu mē rī kormã pahprī hã mar tỳx nē. 21Na pre ÿ hã kapêr jarēnh o mē pa xwỳnhjaja amnhī krã hkôt hkwyjê

mã ujarênh o pa hkêt nê. Tirtūm Karō na pre tanhmã mẽ hkrã hto nhũm mẽ ỹ hã hkwyjê mã tanhmã harênh to ho pa nê ỹ hã mẽ pamã hã kagã.

Tirtūm kapêr jarênh o hêx xwýnhjê jarênh

Korosê 2.16-17; Wam Ximotre 4.1-5; Sikūn Ximotre 3.1-9; Jutre 3-16

2 1Nê amnepê m na pre Ijaew kwýjaja te mẽ kêp Tirtūm nhỹ hã kapêr jarênh xwýnh pyrãk. Nom Tirtūm kapêr kwým ri hkwyjê mã tanhmã ho hêx to ho pa. Tã koja nhỹrmã mẽmojaja mẽ urãk nê mẽ awýr mra nê ã mẽ amã Tirtūm kapêr o hêx o pa anê. Nê kapêr kwým ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhĩ nhĩpêx nyw kaga nê hpãnhã mẽ kot amnhĩ tomnuj kôt apa hprãm xaj nhũm mẽ hêx rom tanhmã mẽ ajahkre hto ho pa. Pahihti Jesus kot mẽ nê htyk tã nhũm mẽ hkôt amnhĩ nhĩpêx kêt nê axtem nê ri kapêr o hêx o pa. Mýrapê koja Tirtūm tokyx mẽ kot amnhĩ xà htýx kamã hamak tũm xà hwýr mẽ rênh pa.

2Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpijaàm kêt nê mẽ hkôt htýx ri tanhmã amnhĩ tomnuj to ho ri pa. Tã ã mẽ kot Tirtūm kapêr o mẽ hêx xwýnhjê mar nê mẽ hkôt amnhĩ nhĩpêx anhýr jakamã koja mẽ kãm Tirtūm kapêr mar prãm xwýnhjaja mẽ kot amnhĩ nhĩpêx ã mẽ omu nê Tirtūm kapêrja mex kêt ã harênh japêr. 3Tirtūm kapêr o mẽ hêx o mẽ pa xwýnhjaja na htem kàxpore pix prãm xaj mẽ awýr mra nê tanhmã mẽ amã kapêr jarênh o hêx to ho pa nhũm Tirtūm ja hã mẽ omunh rãhã ho hkrĩ. Na hte nhỹhým mrar kêt nê rý htýx ôt o hikwý hkêt nê. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja nhỹrmã ma mẽ kot amnhĩ xà htýx kamã hamak tũm xàta hwýr mẽ kurê nhũm mẽ ma hwýr hapêx pa.

4Nê amnepê mã kaxkwa kamã Tirtūm kapêr o mẽ wrýk xwýnh kwýjaja na prem axtem nê Tirtūm kapêr nhĩrôp kuhê nhũm tee ri amnhĩ tã mẽ omu hãmri nê amnhĩ nê mẽ kator pa. Mẽ kamã ukaprí hkêt nê amnhĩ nê mẽ kator pa hãmri nê mẽ kot amnhĩ xà htýx kamã hamak tũm xàta wýr mẽ hano. Nhũm prem ma hwýr pa nê ahkre xupým kãm kamàt kô kamã arĩ hkrĩ ho hkrĩ. Tirtūm kot mẽ piitã tanhmã mẽ harênh to xà hã arĩgroja jamãr o hkrĩ. Nê tee ri kãm hapôx prãm kaprý ho hkrĩ.

5Nê amnepê m pika kamã ri mẽ pa xwýnhjaja na prem haxwýja piitã amnhĩ tomnuj pix o ri pa. Jakamã nhũm Tirtūm ja hã mẽ omu nê mẽ



Sikūn Pêtre 2.5

kamã ukapří hkêt nê. Nê mẽ hwỳr na rax mẽ. Mẽ kãm kapêr mar prãm kêt jakamã nhũm mẽ hwỳr kumê nhũm wrỳk rax kumrêx nê mẽ hanhir pa nê mẽ himex. Âm Noehti mẽ hkwỳ pê 7 pixjaja nhũm mẽ kurom htír nê hkã hkĩnh nê mex nê pa. Noehti kormã na xwỳj ri kot mẽ kãm Tirtũm kapêr jarênh o ri mẽ hkôt pa htã nhũm mẽ kuma nê âm kuma. Mỳrapê na prem piitã pikaprãr pa.

6Nê Sotô mẽ Gomo wa kamã mẽ pa xwỳnhjaja haxwỳja na prem amnhĩ tomnuj tỳx kumrêx o pa nhũm Tirtũm wamtajê pyrã nê mẽ kamã ukapří hkêt nê. Na pre kaxkwa rũm mẽ hipy mẽmo hpòk kwỳ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tirtũm mẽ kot amnhĩ tomnuj xwỳnhjê nhĩpêx anê.

Anhỳr o hamaxpêr kaxyw na pre ã mẽ hipêx anê. 7-8Nom Rohtija na pre Tirtũm Sotô nê kator jakamã nhũm htyk kêt nê. Na pre hkwỳjê rom tãm amnhĩ nhĩpêx tã mẽ kot amnhĩ tomnuj tỳx xwỳnhjê nhõ krĩ kamã òrkwỳ nê ri pa. Nê apkati mẽ tee ri mẽ kot amnhĩ nhĩpêx ã mẽ omu nê mẽ ý hã hkaprí nê tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nê tokyx tãm amnhĩ nhĩpêx kêt nê. Nê apkati mẽ tanhmã amnhĩ tomnuj to nê kapêr punuj o pa nhũm Rohti tee ri mẽ omu nê hkaprí htỳx nê pa. 9Tã nhũm Tirtũm mẽ himex kaxyw nê mẽ nê kator nê mẽ himex pa. Na hte ã Tirtũm mẽmoj punuj pê mẽ kot amnhĩ kaxyw kãm hamaxpêr nê hkôt amnhĩ nhĩpêx xwỳnhjê pytãr anê. No mẽ kot amnhĩ tomnuj xwỳnhjaja na hte axtem mẽ hipêx. Tã koja nhỹrmã mẽ pahpiitã tanhmã mẽ pajarênh to xã hã arĩgro kato nhũm ma mẽ kot amnhĩ xã htỳx kamã hamak tũm xã wỳr mẽ rênh pa. Âm tapxipix kot ã mẽ hipêx anhỳr kaxyw àhpumunh tỳx. 10Tã mẽ hpijaãm kêt kãm amnhĩ tomnuj o mẽ pa xwỳnhjaja nê mẽ kot Tirtũm kapêr mar nê âm mar xwỳnhjaja koja nhỹrmã mẽ homnuj tỳx nê.

Nê Tirtũm kapêr o hêx o ri mẽ pa xwỳnhjaja na htem amnhĩ to jarkrar pix o pa. Nê Tirtũm kapêr o mẽ wrỳk xwỳnhjê hã hpijaãm kêt nê. Nê axtem nê mẽ ho kapêr punuj pê tanhmã mẽ haprỳ hto ho pa. 11Tã nhũm htem amnhĩ tã mẽ kuma nê âm mẽ kuma. Mẽ kurom mẽ hihtỳx kumrêx tã no âm amnhĩ tã Tirtũm mã tanhmã mẽ ho kapêr to hkêt nê.

12Nê mry xoprê na hte htỳx ri pa ho pa. Tã Tirtũm kapêr o mẽ hêx o mẽ pa xwỳnhjaja htem mry xoprêta pyrã nê htỳx ri hamaxpêr mex kêt o pa. Jao hprĩ hã mẽmoj mar kêt tã htỳx ri hijuk ri tanhmã mẽmoj jarênh to.

Nê mry xoprêja htỳx pa nhũm mẽ kot hparja pyrã nê mẽ kot Tirtũm kapêr o hêx o mẽ pa xwỳnhjaja koja Tirtũm nhỹrmã kuwy hwỳr mẽ ho hapêx nê kamã mẽ rênh pa.

13Nê koja nhỹrmã Tirtũm mẽ kot tanhmã mẽ ama hêx to ho pa hã mẽ omunh xã hkôt mẽ homnuj tỳx nê. Na htem hpijaãm kêt nê mẽ piitã

mê noo mã tanhmã amnhĩ tomnuj to ho pa. Kamàt kãm nê arĩgro hã. Nê mê kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa.

Na htem te mê kêp Kris kôt mê atôjê pyrã nê mê akôt Tĩrtũm kapêr mar xà hã ixkre hwỳr agjê nê mê anhĩhkô hã mê kot Jejus tyk mã hamaxpêr kaxyw pãwti hkwỹ hku. Nom htỳx hkur o hkrĩ nê htyk mã hamaxpêr kêt nê. Kãm Jejus kĩnh kêt tã hêx rom hpijaàm kêt kãm mê anhĩhkô hã htỳx ri hkur o hkrĩ.

14Nê nhỹri krĩ hwỳr pøj nê mênijê pumu nê kãm mê hkĩnh nê. Ra mê mjên ri pa htã nhũm mê kãm mê ho amnhĩkati hprãm nê mê kamã hpijaàm kêt o ri pa.

Nê kormã mê kot Kris kôt amnhĩ xunhwỳr tohtuj anhỹr xwỳnhjê hwỳr mra nê hêx rom tanhmã mê kãm kapêr to pê mê no kupyr o ri mê hkôt pa. Mê kot mê mar nê Kris kaga nê mê hkôt ri amnhĩ nhĩpêx prãm xà j ã mê hipêx anhỹr o pa.

Na htem hikàxpore rũnh o pikuprõnh pix kukamã hamaxpêr o ra ho ôxỳ nê.

Ã na htem amnhĩ nhĩpêx anhỹr o pa. Tã ra Tĩrtũm kot mê homnuj tỳx kaxyw mê hã amnhĩ jarê. 15-16Te mê kot kamàt kô kamã pry juk ã hpikunor nê htỳx ri pa pyrãk o na htem amnhĩ nhĩpêx nê kãm Tĩrtũm kapêr mar prãm kêt nê amnhĩ tomnuj pix o pa.

Amnepêm Peo hkra Paraãwta kêp Tĩrtũm nhỹ hã kapêr jarênh o pa xwỳnh tã axtem nê kàxpore rax prãm xà j tanhmã amnhĩ tomnuj to kaxyw. Nhũm Tĩrtũm tee ri ja hã omu nê Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhỹr kêt nê. Tã mê kot Tĩrtũm kapêr o mê hêx ho mê pa xwỳnhjaja na htem Paraãw pyrã nê kàxpore rax prãm xà j tanhmã amnhĩ tomnuj to pix prãm. 17Te hino ra grã nhũm mê tee ri kamã gô japêr pyrãk o na htem amnhĩ nhĩpêx. Rỳ te kakrã hapôx nhũm mê kot omunh nê na wrỳk ã hkamnhĩx kaprỳ pyrãk. Tã ra Tĩrtũm mê kaxyw kamàt kô htỳx pê mê kot amnhĩ xà htỳx kamã hamak tũm xàta o mê nê. 18Na htem htỳx ri amnhĩ tomnuj o pa hã mê amã amnhĩ to jarkrar o ri pa. Jakamã nhũm mēhō ra amnhĩ tomnuj kaga kaxyw nhũm mê tee ri ja hã omu nê kot ã amnhĩ nhĩpêx anhỹr pymaj tanhmã nê kãm kapêr to nê mê kãm:

—Kwa ixte amnhĩ tomnuj o ixpa htã nhũm Tĩrtũm ja hã ixpumu nê ãm ixpumu nê arĩ inhmex ã ijarê. Na pa hte mê hkuprỳjê hwỳr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mê ixpyrà nê arĩ ã amnhĩ nhĩpêx anhỹr o ri apa. Kojã Tĩrtũm tanhmã hã ato hkêt nê. Anê.

Hãmri nhũm mẽ tee ri kuma nẽ ra hamaxpêr kati nẽ. **19**Na htem mẽ kãm kapêr o:

— Kwa mẽ ixpyrà nẽ mãmri amã tanhmã amnhĩ tomnuj to hprãm xà hkôt amnhĩ nhĩpêx o ri apa. Mẽhõ kot kêt ja nê tanhmã amã kapêr to? Anẽ.

Mẽ kot amnhĩ tomnuj xàja te kêp mẽ õ patrãw pyræk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nẽ gaa nẽ axte. Nẽ gaa nẽ ra ho amnhĩ pyræk. Hãmri nẽ tee ri pamã hkaga hprãm kaprỳ nhũm te kêp mẽ panhõ patrãw pyræk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

20Nẽ koja mẽhõ ra Tĩrtũm kapêr ma. Nẽ mẽ panhõ Pahihti Jejus Kris jarênhja nhũm hprĩ hã kuma. Kêp mẽ pahte amnhĩ tomnuj pẽ mẽ papytâr xwỳnh ã harênh ma. Tã nhũm mẽ kot Tĩrtũm kapêr o mẽ hêx xwỳnhjaja hwỳr mra nẽ tanhmã kãm ho hêx to nhũm mẽ kuma nẽ kot amnhĩ nhĩpêx tũm o awjanã. Jao amnhĩ tomnuj tỳx o kormã kot Tĩrtũm kapêr mar kêt ri kot amnhĩ tomnujta jakre. **21**Kêp ãm aa kot Tĩrtũm kapêr mar kêt rãhã htyk ronhỳx ja kãm mex nẽ. Nom ra kot mar mex tã ãm kuma nẽ hkaga jakamã koja mex kêt kumrêx. **22**Mẽ kot ã mẽ kot amnhĩ nhĩpêx anhỳr ã mẽ harênh kot:

Rop na hte ôjaĩr nẽ akupỳm ôjaĩrta ku.

Nẽ hagrô na htem unê nẽ hkumrã nhũm muxre. Tã nhũm mẽ kãm ure nhũm akupỳm hprôt nẽ mra nẽ akupỳm gyw o amnhĩ tomnu pa. Anẽ.

Tã mẽ kot Tĩrtũm kapêr o mẽ hêx xwỳnhjê mar nẽ mẽ hkôt amnhĩ nhĩpêx xwỳnhjaja te mẽ kot rop mẽ hagrô wa kot amnhĩ nhĩpêxta pyrà nẽ Tĩrtũm kapêr kaga nẽ akupỳm mẽ kot amnhĩ nhĩpêx tũm o awjanã nẽ htỳx ri amnhĩ nhĩpêx o pa.

**Tĩrtũm kot pika ho hapêx kaxyw kormã amnhĩ tã
mẽ pajamãr ã harênh**

Matêwre 24.29-31; Xiakre 5.7-11; Apokariip 19.11-16, 21.1-8

3 **1E** Kris kôt ixkràmnhwỳjaja. Na pa pre ra wam kagàta nhĩpêx nẽ mẽ awỳr kurê. Tã ra axte hkôt ja nhĩpêx. Hamẽ wa kamã na pa mẽ amã Tĩrtũm kot tanhmã amnhĩ nhĩpêx to hã harê. Nẽ Jejus Kris nhỹrmã akupỳn mẽ pahwỳr wrỳk ã harê. Mẽ ate mar nẽ tãm amnhĩ nhĩpêx nẽ tãm ajamaxpêr o kutêp mẽ apa kaxyw.

2Amnepê mã Tĩrtũm nhỹ hã kapêr jarênh o ri mẽ pa xwỳnhjaja na prem Tĩrtũm kot nhỹrmã mẽ pahwỳr mẽhõ mênh mã xwỳnhhta jarênh o pa. Kot nhỹrmã mẽ pahwỳr wrỳk nẽ mẽ pahto amnhĩptâr o pa hã harênh o pa. Tã kêt ka mẽ kapêr ma nẽ hã ano htỳx nẽ hkôt ajamaxpêr tỳx rãhã ho ri apa. Nẽ Jejus kot mẽ awỳr mẽ rênh xwỳnhjaja ka mẽ kapêr ma. Mẽ kot mẽ amã mẽmoj jarênh o mẽ pa xwỳnhjaja na htem tanhmã mẽ

amã Pahihti Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapêr ma nê hã ano htỳx nê kãm ajamaxpêr tỳx rãhã ho ri apa.

3Nê kwa mẽ inhma. Nhỹrmã Kris akupỳn mẽ pahwỳr wrỳk xwỳj ri koja mẽ kot amnhĩ tomnuj tỳx xwỳnhjaja mẽ awỳr mra. Mẽ hpijaam kêt o pa xwỳnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwỳ hã mẽ apumu nê mẽ atã hpêr o pikênh o pa. 4Nê htỳx ri Kris ã mẽ akukja nê mẽ amã:

—Kwa no Krisja? Amnepêm akupỳn wrỳk nê mẽmoj piitã tanhmã hipêx to hã amnhĩ jarênh tã arĩ Tirtũm kot mẽmoj to kator krax rũm mẽmoj amarĩ rãhãã. Ra mẽ panhĩgêjtaja pikaprãr par tã nhũm kormã akupỳn wrỳk kêt nê. Kot mẽ pamã amnhĩ to hêx kênã. Mo kaxyw koja kêt akupỳn mẽ pahwỳr wrỳ? Kot mẽ pamã amnhĩ to hêx kênã. Anê.

5-6Nom ã mẽ kot harênh anhỹrja kot anhỹr kêt. Tirtũm kot mẽmoj to kator krax rũm mẽmoj amarĩ rãhã hã mẽ kot harênhja kot anhỹr kêt. Na pre Tirtũm kapêr pix o kaxkwa nê pika ho kato. Nhũm gô hkwỳja kapêr mar xà hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mẽ kapêr mar kêt kumrêx. Nê mẽ kot amnhĩ tomnuj tỳx mỳrapê na pre Tirtũm gô ho mẽ himex pa. Jao mẽ hwỳr na rax mẽ nhũm mẽ hanhir o mẽ ho hapêx. No nhũm mẽ kot Jejus wrỳk ã hpêr o pikênh xwỳnhtaja kãm ã mẽ harênh anhỹrja mar prãm kêt. Ra mẽ kot mar tã kãm mar prãm kêt nê arĩ mẽmoj piitã rãhã hã ri harênh o pa. 7Pika nê kaxkwaja arĩ rãhã htã koja Tirtũm nhỹrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htỳx kamã hamak tũm xà hwỳr mẽ kot amnhĩ tomnuj xwỳnhjê rênh pa. Hãmri nhũm rĩ kormã kaxkwa nê pikaja wa pôr nhũm himôk ã mẽmoj piitã hkaxàr pa nê hapêx.

8Nê amgrà pê 1.000ja mẽ pamã amgrà xohtô rax kumrêx no Tirtũm mã te arĩgro pixire pyrãk. 9Tã ra kot mẽ pamã tokyx Jejus akupỳn wrỳk ã harênh tã nhũm kormã wrỳk kêt jakamã nhũm htem tôhã tee ri hamãr o pa nê hamaxpêr o:

—Hêxta waa nê. Tirtũm kot tokyx akupỳn mẽ pahwỳr Jejus mẽnh ã amnhĩ jarênh tã tokyx mẽnh kêt nê.

Anhỹr o harênh tã no ãm kot anhỹr kêt. Na kormã amnhĩ tã mẽ kot amnhĩ tomnuj xwỳnhjê jamãr o pa. Mẽ kot amnhĩ tomnuj kaga nê hkôt amnhĩ xunhwỳr prãm xaj kormã amnhĩ tã mẽ hamã. Kãm mẽ kot amnhĩ xà htỳx kamã hamak tũm xàta wỳr mễhõ ho pixire nê mỗr prãm kêt jakamã na kormã amnhĩ tã mẽ hamã. 10Tã koja nhỹrmã mẽ panhõ Pahihtija akupỳn mẽ pahwỳr wrỳ. Te mẽ àhkĩnh xwỳnh kot amnhĩ nhĩpêx pyrãk o mẽ pajaêr pê akupỳn wrỳ. Pu mẽ pahtỳx ri tanhmã paxápênh to ho ri papa nê akupỳn wrỳk ã hkamnhĩx kêt rãhã nhũm mẽ pajaêr pê akupỳn wrỳ. Hãmri nê ma akupỳm amnhĩ kôt mẽ pahte hkôt

amnhĩ xunhwÿr xwÿnhjê ho àpir par kurê kumrêx. Hāmri nhūm rĩ kormā kaxkwa kaxàr o hkrihkrit tÿx kām hapêx pa. Nê kanhêti mē myt nê mytwrÿre kaxàr pa. Nê pikaja nê määnēn kamā mēmoj piitā kaxàr pa. 11-12Koja nhÿrmā ã mēmoj hapêx par anê. Jakamā kwa kêr pu mē Jejus kutêp tām ri amnhĩ nhĩpêx rāhã ho ri papa. Nê Tirtūm kapêr kôt pix mā amnhĩ nhĩpêx rāhã nê. Nê kām hprām xà hkôt tanhmā kām amnhĩ nhĩpêx to ho ri papa. Kêr kê Jejus akupÿn wrÿ nê ã mē pahte amnhĩ nhĩpêx anhÿr ã mē pahpumu. Koja wrÿ nhūm rĩ kormā kaxkwa nê pikaja wa kaxàr pa. Nhūm kuwy mÿri kaxkwa kamā mēmoj harir xwÿnhja xêr nê ôr pa nê hapêx. 13Tã kwār māmri mēmoj ã amnhĩ nhĩpêx anê. Koja Tirtūm axte mēmoj mex nhĩpêx. Na pre amnhĩ kukamā ja jarēnh o:

Kot paj axte pika nê kaxkwa hō nhĩpêx nhūm mex o mex. Nhūm mē kot amnhĩ kaxyw Jejus mā hamaxpêr nê hkôt amnhĩ xunhwÿr nhūm ixte mē mex ã mē harēnh xwÿnh pixjaja koja mē pika nywja kamā mex nê pa ho pa. Anê.

14Jakamā kwa ixkrāmnhwÿjaja. Kêr ka mē Kris kutêp kapêr kôt amnhĩ nhĩpêx mex rāhã ho ri apa. Jao kutêp ajamakêtkati nê axāmnhix axpēn kôt apa. Kêr ka mē nhÿrmā amnhĩ wÿr omu nê tee ri amnhĩ kukamā ajamaxpêr kêt nê. Ate tām amnhĩ nhĩpêx o apa hã amnhĩ pumu nê akĩnh nê amnhĩ wÿr omunh o akuhê.

15Nom arĩ Jejus kām mē pahkwÿjê ho hkra hprām jakamā na kormā amnhĩ tã mē hamā nê tokyx akupÿn wrÿk kêt nê. Na pre Jejus kôt mē pahtō Pawre Tirtūm nhÿ hã ã mē pamā ja hã kagà anê. Pawreja ixkrāmnhwÿ mex na. 16Na hte mē pakaxyw kagà nhĩpêx nê kamā mē pahte Jejus kutêp tām amnhĩ nhĩpêx o papa hã mē pamā karō. Na hte tōhã mēmoj tã kagà pu mē kamā harê nê tee ri pahprĩ hã mar mā no ãm mar mex kêt nê. Hāmri nhūm Tirtūm kapêr o mē hêx o mē pa xwÿnhjtaja haxwÿja kuma hāmri nê amnhĩ krã hkôt hijuk ri tanhmā ho hêx to. Te mē kot hprĩ hã mar nê harēnh pyrāk nom hprĩ hã mar kêt nê. ã na htem Tirtūm kapêr ã kagà piitā ho hêx o pa anê. Mÿrapê koja mē nhÿrmā amnhĩ xà kamā hamak tÿx kumrêx.

17Tã e Kris kôt ixkrāmnhwÿjaja. Ra mē ate mē harēnh mar jakamā kwa mē okora. Mē amnhĩ nê mē omunh mex nê mē hkôt amnhĩ nhĩpêx kêt nê. Kot kaj mē anê nê Tirtūm kôt amnhĩ nhĩpêx mex kêt nê. 18Na ka htem mē papytār xwÿnh Pahilti Jejus Kris kôt ri amnhĩ nhĩpêx o apa. Tã kêr ka mē arĩ hkôt amnhĩ nhĩpêx mex rāhã ho ri apa. Nê hkôt amnhĩ xunhwÿr tÿx nê. Kêr kê amnhĩ tã mē apumu nê mēmoj to mē akutã nojarêt nê. Krisja mex o mex nê hihtÿx o hihtÿx. Tã kêr pu mē kām mex o mex ã mǎn harēnh rāhã ho ri papa.

Tã ãm ja pix. Ixpê Simāw Pêtre na pa ã mē amã ja hã kagà nê mē awÿr mēnh anê.